

'Henti semua amalan kartel tindas rakyat'

PM mahu usaha banteras, hapus ketirisan dilaksana menyeluruh

Oleh Siti Aminah Mohd Yusof
bhnews@bh.com.my

Butterworth: Datuk Seri Anwar Ibrahim mahu semua amalan kartel yang menekan rakyat menerusi kenaikan harga dalam pelbagai sektor, termasuk pertahanan, kesihatan dan pembinaan, dihentikan.

Perdana Menteri berkata, kewujudan kartel bukan sahaja membebaskan rakyat, tetapi juga menyebabkan pembaziran peruntukan kerajaan selain menjejaskan usaha menambah baik perkhidmatan awam dan kemudahan asas kepada rakyat.

"Jangan bergantung pada kartel yang menekan rakyat melalui kenaikan harga melampau dalam pelbagai sektor ter-

masuk pertahanan, kesihatan dan pembinaan," katanya ketika berucap pada majlis pelancaran blok baharu Hospital Seberang Jaya di Perai, semalam.

Anwar berkata penguasaan kartel dalam sistem perolehan serta pasaran tertentu mengakibatkan peningkatan harga yang tidak munasabah, sekali gus menyukarkan kerajaan menyalurkan dana tambahan untuk projek pembangunan seperti pembinaan hospital, klinik dan kemudahan rakyat di kawasan lain.

Perdana Menteri berkata, beliau turut memberikan penekanan khusus terhadap sektor pertahanan negara yang memerlukan pengurusan perolehan berintegriti serta bebas daripada pengaruh kartel.

Anwar berkata usaha membanteras kartel serta menghapuskan ketirisan perlu dilaksanakan secara menyeluruh merentasi semua kementerian dan jabatan supaya penjimatan yang dicapai dapat dipulangkan semula kepada rakyat dalam bentuk kemudahan, bantuan serta peningkatan kesejahteraan.

Sementara itu, berucap pada



Anwar melawat pesakit selepas menyempurnakan majlis pelancaran blok baharu Hospital Seberang Jaya di Perai, semalam. (Foto BERNAMA)

Karnival Kebudayaan MADANI dan Kenduri Rakyat Pulau Pinang 2026 di Pejabat Pendidikan Daerah Seberang Perai Tengah, Permatang Pasir, Anwar berkata prestasi ringgit di kedudukan terbaik di Asia pada ketika ini mencerminkan keberkesanan dasar tatakelola kerajaan, kestabilan politik serta keyakinan pelabur terhadap hala tuju ekonomi negara.

Perkukuh nilai ringgit

Beliau yang juga Menteri Kewangan berkata, pengukuhan nilai mata wang negara turut didorong usaha berterusan kerajaan memastikan keamanan melalui peranan serta kerja keras tentera, polis selain ketegasan kerajaan dalam membanteras rasuah dan pecah amanah.

"Di rantau kita, Malaysia jika dilihat dari segi ekonomi, ringgit kita prestasi terbaik di Asia. Bukan terbaik dibanding di ne-

gara jiran, tetapi di seluruh Asia ringgit kita terbaik.

"Kita kena kerja kuat, jaga negara, mula dengan tatakelola yang baik. Jangan bagi ada duit lebih, 'sapu' masuk dalam poket. Ada duit lebih, ambil komisen. Ada duit lebih, percayakan anak beranak," katanya.

Kelmarin, ringgit dilaporkan melepasi paras psikologi penting 4.00 berbanding dolar AS apabila mencecah paras tertinggi dalam tempoh lebih tujuh tahun pada 3.9992 sekali gus menandakan paras paling kukuh mata wang Malaysia dalam tempoh lebih tujuh tahun.

Beliau menegaskan tindakan penguatkuasaan diambil tanpa mengira status individu, termasuk golongan berpengaruh dan kaya dilakukan demi memelihara amanah rakyat dan memulihkan keyakinan terhadap institusi negara.

Menurutnya, dalam perole-

han pertahanan, kerajaan berpegang kepada prinsip memilih aset yang benar-benar diperlukan negara tanpa campur tangan ejen atau unsur komisen.

"Sebab itu saya tak mahu apa-apa tindakan yang baru-baru ini itu seolah-olah itu memberi gambaran semua angkatan tentera (tetapi) kita perlu tegas.

"Nak beli senjata, jangan pakai komisen. Nak beli senjata, jangan ikut ejen. Mesti pilih apa yang negara ini perlu dan bawa manfaat kepada negara ini, itu kita lakukan," katanya.

Perdana Menteri berkata, dalam soal kebajikan rakyat, kerajaan telah meningkatkan peruntukan bantuan, termasuk Sumbangan Tunai Rahmah (STR) dan Sumbangan Asas Rahmah (SARA) dengan jumlah keseluruhan RM15 bilion, selain kenaikan gaji penjawat awam membabitkan RM18 bilion tahun ini.